



The Holy See

IOANNES PAULUS PP. II LITTERAE APOSTOLICAE **MERITO QUIDEM** TEMPLUM PAROECIALE SANCTI
LUGDERI, QUOD EST
IN URBE EPISCOPALI «ESSEN-WERDEN» INTRA GERMANIAE FINES,
IN SIGNITUR TITULO AC DIGNITATE BASILICAЕ MINORIS Ad perpetuam rei memoriam. – Merito quidem celebratur in
Germania templum paroeciale Sancti Ludgeri, quod est in urbe episcopalı «Essen-Werden» aedificatum enim saeculo IX
ab eodem Apostolo Frisonum et Saxonum atque dein igne consumptum iterumque exstructum secundum genus
architecturae Romanicum Coloniense, anno MCCLXXV ab ipso Sancto Alberto Magno consecratum est. Constat
praeterea fideles loci totiusque regionis ad eandem ecclesiam frequentes accedere corpus tam incliti Sancti et Patris sui,
illic pie servatum, veneraturos et a benignissimo Deo supernum petituros auxilium. Qua re, cum Venerabilis Frater
Hubertus Luthe, Episcopus Essendiensis, litteris die XXIX mensis Martii hoc anno datis, etiam cleri populi que nomine
petiverit ut templum idem titulo ac dignitate Basilicae Minoris honestarem, Nos, peculiare benevolentiae signum dilectis
filiiis Essendiensibus cupientes praebere, eius sollertis Pastoris precibus perquam libenter obsecundandum esse
putamus. E sententia igitur Congregationis de Cultu Divino et Disciplina Sacramentorum, quam ratam habemus, summa
Apostolica potestate, harum Litterarum virtute perpetuumque in modum templum paroeciale, de quo mentionem fecimus,
titulo ac dignitate Basilicae Minoris decoramus, omnibus factis iuribus ac liturgicis concessionibus, quae sacris aedibus
hoc nomine insignitis rite competit, its tamen servatis, quae secundum Decretum «De titulo Basilicae Minoris» die IX
mensis Novembri anno MCMLXXXIX editum, servanda sunt. Has denique Litteras nunc et in posterum ratas esse
volumus, contrariis quibuslibet rebus non obstantibus. *Datum Romae, apud Sanctum Petrum, sub anulo Piscatoris, die XII
mensis Iulii, anno MCMXCIII, Pontificatus Nostri quinto decimo.* ANGELUS card. SODANO

Secretarius Status © Copyright 1993 - Libreria Editrice Vaticana
